



衛藏通志

| |
|------|
| ル 5 |
| 3200 |
| 4 |



門 几 5
號 3200
卷 4

衛藏通志卷八

兵制

原目作番兵

謹案唐古忒番兵向來分派各寨農民有事則調集爲伍旣無統率又少操嫻雖有數萬之名僅爲虛設自乾隆五十七年定議額設差操與駐防綠營兵丁一體訓練洵足爲衛藏保障也謹照原議編纂以重巡防

乾隆五十七年十一月大學士公福康安等會

奏爲酌定唐古忒番兵訓練事宜縷陳條例恭請

聖訓事一唐古忒兵丁分設前後藏地方應酌定數目以

肅兵制也查唐古忒番兵原設有五千一百六十五名之數其實兵民不分係按各寨番民定以派兵數目並非額設番兵可比戴琫平日無兵可管遇事調遣祇在各寨抽派與派烏拉人夫無異充數應名多不使用軍器以猝然調集之番民責令打仗禦賊無怪其毫無紀律怯懦不堪今請額定數目於前後藏各設番兵一千名此外衝途要隘之定日江孜地方安設番兵各五百名共額設三千名實兵此項番兵卽在安設地方就近挑補以省調戍之繁前藏原設戴琫二人卽令各管新設兵五百名後藏原設戴琫三人以二人駐劄後藏以一人分駐定日均各管該處新設兵五百名再添戴琫一名分駐江孜亦管新設兵五百名各處俱有原設新設之駐防將備弁兵卽令督率管束教演技藝前藏番兵歸遊擊統轄後藏及江孜定日番兵歸後藏都司統轄所有挑補番兵造具花名清冊交該管遊擊都司及戴琫稽查外仍另繕名冊二本一呈駐藏大臣衙門一交噶廈公所遇有事故核實挑補隨時呈報以資考察 一核定管兵番目以專責成也查藏內管兵番目不但戴

琫一員徒爲虛設卽戴琫以下之如琫甲琫定琫等頭目亦祇空有其名無裨實用每遇出兵另派第巴數人管領其頭目兵丁彼此各不相識安望其協力齊心奮勇出力今於原設戴琫五名外添設戴琫一名自應仍照舊制設立大小番目逐層管束於戴琫之下設立如琫十二名每名管兵二百五十名如琫之下設立甲琫二十四名每名管兵一百二十五名甲琫之下設立定琫一百二十名每名管兵二十五名與綠營兵目相似以上大小番目俱由駐藏大臣會同達賴喇嘛揀選年力精壯之人充補發給委牌倘敢虛應故事廢弛軍律卽行革退並將本管番目從嚴懲治至戴琫之缺向俱由營官陞補亦有戴琫子弟及東科爾徑行補放者充補旣無等級人皆不知勸勵嗣後總應按照等差遇有戴琫缺出卽以如琫拔補其餘各缺皆擇技藝嫻熟操防認真者以次遞陞其有世家東科爾陞轉俱屬過優不由東科爾出身者拔至定琫而止嗣後東科爾情願充當番兵及定琫兵目者准其充伍按次陞用不准躐等超越番兵中如有材技出眾之人不但拔補定琫仍一體

按次陞擢至戴琫如內地營制果有出色兵丁卽
可由行伍出身以次擢用至提鎮番兵亦當仿照
此例不得以非東科爾世家阻其上進之路如此
定立營制明示勸懲庶可武備修明人知奮勵
一唐古忒番兵及管兵番目應分別酌給錢糧口
糧以資養贍也查藏內調派番兵從不給與口糧
卽出兵之時亦不免其徭役番民被調後自行備
帶口糧前往糧盡而逃勢所必至此次調派番兵
帶口糧

軍營

雖該兵積習相沿間有逃逸

而臣福康安派守後路熱索橋等處番兵及成德
帶往聶拉木番兵駐劄數月逃者甚少固由嚴行
約束亦緣口食有資是唐古忒兵非不可振作茲
蒙

訓示以旣用其力若不給與口糧自必愈生退縮令商上
給與口糧如須添補卽於陽八井沙瑪爾巴家資田產
內酌量撥給添補口糧並將廓爾喀繳出札什倫布銀
兩留給防兵今旣不設官兵卽可爲添補番兵之用仰
見

聖主體恤恩慈昭垂經制實屬法良意美應請將此項額

律應通志卷八
四
設番兵三千名每年每名給與青稞二石五斗遇有征調再照征兵之例每名每日商上支給糈粃一觔每年口糧共需青稞七千五百石所有此項青稞平價採買須銀一萬數千兩原應前後藏商上給與但商上除每年額用外少有贏餘不能支給自應遵

旨於沙瑪爾巴莊田所出青稞內撥給而核沙瑪爾巴莊田稞麥爲數亦有不敷現據丹津班珠爾之子呈繳歸公莊田五處又有仲巴田地四塊合之沙瑪爾巴莊田每年統共收青稞三千一百七十石所少青稞四千三百二十餘石祇須於廓爾喀交出札什倫布銀兩及沙瑪爾巴各物變價內酌撥銀兩作爲開墾地畝之費耕種卽敷支給如此辦理各兵旣不至枵腹從事而以各處歸公之莊田銀兩爲唐古忒兵丁口食之用

天朝並不利其所有旣可贍給兵食兼可折服番民於事實爲兩得所有番民挑定額兵者俱由達賴喇嘛發給執照免其一家充當烏拉徭役以示體恤如有事故革退仍將執照繳回至月餉一項若照屯兵之例每名每月給銀五錢計算三千名番兵每

年卽需銀一萬九千兩達賴喇嘛商上及大招庫
內布施較少每年攢招及念經賞項卽需銀十一
萬兩有零此雖無益之費但藏內習俗信佛亦不
便徑爾裁減再加以一切日用置買物價核算出
入實少贏餘不能再給番兵月餉況此等番兵前
此從無給以養贍之事今旣每名每年給青稞二
石五斗免其徭役又復給以糴粃較之從前一無
所得相去懸殊卽不給以月餉已覺欣喜過望斷
不敢再萌奢望惟管兵大小番目自當酌予養贍
俾資辦公除原設戴琫五名例各給莊田一分新
設戴琫一名亦令達賴喇嘛照例撥給莊田一處
毋庸再給錢糧外其如琫番日照川省馬兵月餉
米折之例每名每年酌給銀三十六兩甲琫照戰
兵之例每名每年酌給銀二十兩定琫照守兵之
例每名每年酌給銀十四兩八錢共需銀二千六
百零八兩爲數無多卽由前藏商上支發此項銀
兩令商上於春秋兩季備文送交駐藏大臣衙門
轉發該管將備會同戴琫等傳齊番目支領如有
侵漁剋扣一經查出卽行嚴參治罪其番兵應支
青稞亦分兩季令該管將備會同戴琫等按名散

給一唐古忒兵丁應給與軍器火藥認真操演
明示賞罰以肅軍紀也查額設唐古忒兵丁業已
議給口糧並免其徭役卽與官兵無異自當遵

旨常川訓練並令各處駐防將備就近督同大小番目按
期認真教演駐藏大臣每於巡查之便親爲較閱
練習純熟者酌加獎賞並將該管之番日記名陞
擢如有技藝生疎者嚴行責懲屢教不悛卽予斥
革番目等亦分別責降示懲駐防將備俱以所管
番兵優劣由駐藏大臣分別等第於年班滿時咨
部優等者咨送本省將軍總督提督准予保

題仍照舊例陞用次等者祇准咨部議敘毋庸陞用
劣等者卽行參革賞罰旣明軍紀自昭整肅汛防
可資得力至向來調派番兵器械鉛火皆令自備
本屬不成事體今已設立額兵三千名每一千名
定以五分烏鎗三分弓箭二分刀矛將查鈔沙瑪
爾巴等家產內器械分給如有不敷查向來前後
藏大小寺廟中收存較多俱係番民受戒所繳應
擇其堅利者商上略如修整按名分給所需弓箭
查番民習射者甚多俱用木弓竹箭弓力頗勁尙
堪使用製辦亦屬省便查沙瑪爾巴貲產內除每

年青稞支給番兵外所餘牛廠徵收酥油尙可值銀五百五十餘兩足敷將來製辦弓箭之用操演所需之鉛丸火藥查商上每年差人赴工布製辦火藥邊壩等處有例交商上鉛筋存貯布達拉本屬無用應卽將每年商上所收之鉛彈火藥發給番兵以重操防 一濟隴聶拉木等處邊界毋庸另派番兵駐守也查從前訓練章程祇係託諸空言並未詳定規制今廓爾喀經官兵大加懲創之後革心革面悔罪投誠斷不虞再有反覆 臣等查看情形公同酌議現在定日江孜爲各邊界來藏要路已於各該處酌設備弁兵丁稽查出入又於每處各額設唐古忒兵共五百名隨同操演果能實力奉行數年之後漸成勁旅自足懾服番夷所有各邊界以及札木地方竟無庸安設番兵防守 一嚴禁將備弁兵欺凌番兵並役占番兵之弊以實營伍也竊 臣前奉

諭旨令 臣惠齡慎選出色頭等員弁派駐西藏並准駐藏大臣驗看駁換務使派駐官員與唐古忒兵丁聯爲一體實爲永靖邊隅之道現在應換將備 臣等卽於隨征滿漢營員內挑選充補嗣後換前後藏

及定日江孜官員兵丁總令四川總督遵

旨揀選出色頭等員弁派來駐藏不得以平庸之員充數駐藏大臣亦當公同驗看不得稍有徇隱如有營私舞弊欺凌唐古忒兵丁等事令戴琫等稟知駐藏大臣隨時嚴辦設該戴琫等操防怠惰苦累番民亦令將備等稟明究辦如此互相鈐制庶彼此各知顧忌不致徇私戩法日久弊生至新設之番兵三千名俱係定額實數該管將備及戴琫等不得擅行占役若於例外私令跟隨服役轉致差防乏人一經查出卽行從嚴治罪

又具

奏臣等籌議在邊界設兵控禦或於各臺駐藏換班兵內以及打箭鑪以外臺站官兵量爲抽撥

聖訓周詳無微不至惟是藏地向來設有汛防其外番人等往來自便毫無稽查實屬不成事體現在扼要總路共有兩處一係江孜地方與定結帕克哩噶爾達相通爲布魯克巴哲孟雄宗木等處部落來藏要路且自江孜至薩迦溝行走又可繞往聶拉木一帶邊界一係定日地方爲聶拉木濟隴絨轄要路又可通往薩喀等處途逕紛歧惟定日江孜

德隆通志卷八
九
兩處爲各部落來藏咽喉必經之路應於江孜添設一汛派守備一員外委一員帶兵三十名駐劄又於定日添設一汛派守備一員把總一員外委一員帶兵四十名駐劄所有添設巡查官弁兵丁應遵

旨於藏內及臺站兵丁內抽撥查前藏駐劄遊擊一員守備一員千總二員把總三員外委五員兵四百五十五名後藏駐劄都司一員外委一員兵一百五十名打箭鑪以外共設遊擊一員都司一員守備三員千總二員把總七員外委九員兵八百三十

二名應於東臺站內查無夾壩出沒之地及後藏兵丁內尙可酌量抽撥臣等公同籌議擬於察木多抽撥兵四十名拉里抽撥十名後藏抽撥十名以上共抽撥兵六十名應得之項俱照西藏防兵定例支給其應撥調之守備二員把總一員外委二員照例由川省派出所有官員兵丁俱於現在隨征官兵內挑派前往仍照前後藏駐防之例班滿更換所需房屋查明於定日江孜營官寨之旁各撥數十間用資棲止毋庸動項添蓋至藏內不必另議增添統交駐藏大臣督率將弁勤加操演

新添之定日江孜汛兵亦卽於駐藏大臣巡查之
便就近查驗操防以肅營伍等因經軍機大臣議
覆具

奏奉

硃批依議欽此

又會

奏章程內開一駐藏大臣每年應親身巡查邊境以
重地方也查駐藏大臣同在前藏其駐劄相近之
處尙易稽查而前藏迤西直至邊界一帶地方遼
闊耳目難周後藏江孜定日又有新設番兵與該

二汛綠營官兵均應駐藏大臣親加較閱核其勤
惰以示勸懲濟隴聶拉木等處邊界現已定立界
址亦須周徧巡查方可諳習情形遇事庶有把握
本擬駐藏大臣二人按季輪流前往但藏地入夏
以後農事正忙甫交冬令冰雪已盛且邊界距前
藏甚遠往返約需兩月有餘若駐藏大臣四季輪
往未免諸多窒礙應請於春秋兩季

奏明輪流前往後藏巡視邊界順便操演番兵經過
地方如有駐防官弁等苦累兵丁番民者准其呈
控駐藏大臣隨地查辦懲治至駐藏大臣所用烏

拉人夫俱令自行給價不得擾累番民以示體卹
一駐藏大臣衙門及文武各員酌定聽差兵丁
數目以實操防也查西藏戍兵原因鎮守地方而
設若大臣官員等多挑兵丁使喚必致操演乏人
殊屬不成事體此等應差兵丁從前原無定額今
將各處應差兵丁遵

旨再加裁減庶在藏兵丁皆歸實用不致有名無實應請
嗣後駐藏大臣衙門應差兵丁每處三十名遊擊
八名都司六名守備二員每員四名駐藏司員四
名筆帖式二名千總把總每員一名前藏糧員酌
定看庫兵丁八名其新設之後藏文員毋庸給與
統計應差兵丁不過百餘名而止每遇操演日期
仍著一體操演毋許藉口應差致有曠廢如此則
營伍制度愈昭整肅等因經軍機大臣議覆具

奏奉

硃批依議欽此

十二月又會

奏章程內開一西藏官兵所需火藥應就本地配造
以節糜費也查駐藏官兵每年操演共需火藥二
千餘觔向由內地各營配造運送來藏雖工料自

有定價而打箭爐運至前藏需用腳價較多經過番地亦不免有偷竊之弊臣福康安到藏時查得工布地方產礮布達拉現存火藥卽係該處配造隨卽差弁前往製造曾經

奏明將來火藥如藏地可以就近製辦卽不必由川省遠解來藏致費腳價茲查工布製造火藥每百觔共價銀二十三兩有零所用工料雖較內地昂貴而所用腳價較之內地運來節省至三十餘倍之多兩相比較仍係在藏配製大有節省所有軍需案內運來火藥已到西藏者除軍營用去外尙

有餘存現在飭查觔數令各糧員分運前後藏擇高燥地方收貯儘足供數年操演之用尙可毋庸配製俟將現存火藥將次用竣祇敷兩年備用之時再行在藏配造若由駐藏遊擊派人前往工布恐所遣之人未妥或致擾累番民並慮有私造透漏之弊應核定每年操演火藥數目由駐藏大臣衙門發給印票交噶布倫差派誠實番目前赴工布地方製造解送來藏至藏地產鉛甚少現有軍營存贖鉛丸堪以應用俟將次用完時再由川省運解操演火繩亦照向例由川省運解又內地解

來弓箭除軍營應用外亦有存餘應並留存前後藏撥給官兵作為操防之用又後藏向無礮位現於臣福康安進兵時所鑄銅礮十三尊內撥給二尊令於操演時試演準頭其餘俱交布達拉存貯等因具

奏奉

硃批諸凡皆妥欽此

五十八年四月工部尚書和琳副都統成德具奏為前藏新設番兵挑選足額一律操演並赴後藏較閱各緣由恭摺奏

聞事竊臣等奏請添設唐古忒兵丁三千名分設前後藏

定日江孜等處駐防前經軍機大臣議奏奉

旨依議欽此欽遵在案查藏中舊例一切兵役總係按戶

口分派番民愚蠢若不將

皇格外恩施令商上給與口糧及免其徭役如有人材

出眾之人一體按次陞拔之處明白曉諭番民等

必不能踴躍從事是以臣等逐條頒發告示遍懸

村落去後一月之間紛紛投首情願充當兵丁者

甚多茲據前藏遊擊逐一揀選年富力強者一千

名造具花名清冊呈報臣等公同點驗俱屬年輕

壯健堪以充伍且各番兵皆自備有鳥鎗弓箭刀
矛雖與綠營樣式不一但番民習用既慣自可毋
庸更換以節糜費今照奏定五分鳥鎗三分弓箭
二分刀矛之例令與駐藏兵丁一齊操演臣等頻
加驗閱已覺漸次可觀現在選派綠營熟手數名
作為教習每日試演臣等察其熟習者酌加賞賚
生疎者量予責懲再過數月可望均成勁旅臣等
伏思唐古忒兵民向無分別今新挑額設之兵常
川操練卽與綠營兵丁無異若與番民無有區別
誠恐日久復有逃匿等事兵民雜處難以稽查因

趁立法之初諭令鬚頭番兵無不樂從目下皆已
鬚髮再查綠營例有號衣號帽旗幟等件所以肅
觀瞻而昭區別今唐古忒兵民裝束如一未爲妥
協如爲之另製號衣號帽所費未免過多莫如因
地制宜衣帽仍照唐古忒式樣擬令鳥鎗兵穿紅
褐背心弓箭兵穿白褐背心刀矛兵穿白褐紅邊
背心各書番兵二字以爲分別計所需紅白褐物
價無多臣和琳現在已於養廉內照數捐辦再後
藏及江孜定日應設番兵二千名據都司守備等
呈稟已挑有十分之七均可足額等語查新定章

程駐藏大臣於春秋二季輪流前往閱邊察看設
立鄂博順道較閱營伍在案今臣成德現無別事
應卽起程前赴各邊界巡查鄂博點驗江孜定日
新挑番兵統俟臣成德查明另行具
奏再據各營官具稟濟隴聶拉木官寨陸續興修已
有十之七八臣成德巡查之便應卽逐一履勘務
使堅固完善以期經久等因具

奏奉

硃批諸凡皆妥知道了欽此

六月又會

奏爲查閱後藏各邊界新設番兵及履勘鄂博情形
臣成德前與和琳通盤計議江孜爲前後藏往來
通衢新設漢官番兵駐防足資稽查毋庸設卡惟
定日地方遼闊爲聶拉木宗喀絨轄三處總匯之
地實爲緊要查所通絨轄之小路轄爾多通宗喀
之小路擦木達杏嶺通聶拉木之小路古喇噶木
洞並宗喀共計五處均爲要隘每處設定瑋一名
番兵二十五名卽於定日現設番兵五百名內就
近派撥安設似於聲勢更爲聯絡亦不妨其隨時
操演臣於派撥後量加獎賞隨赴交界處所逐一

挨查被兵後新修察落均已完竣尙屬堅固足資
棲止守禦各邊界外所立鄂博亦俱堆立齊整等
因具

奏奉

硃批欣慰覽之欽此

七月又會

奏爲查閱帕克哩定結各卡隘情形查噶爾達地方
卡隘二處一名撒迦嶺一名春堆此二處均與廓
爾喀相通又定結地方卡隘一處地名擢拉山此
處與廓爾喀哲孟雄兩路相通又帕克哩地方卡
隘三處一名哲孟山與布魯克巴相通一名哈爾
山與布魯克巴小路相通一名宗木山與宗木相
連以上卡隘六處均歸江孜前後藏大道爲總匯
要隘前臣等會同福康安於江孜奏添守備一員
駐防之時隨公同商酌於此六處設立卡隘派撥
番兵分防巡守今臣成德親赴各處逐一查勘點
驗番兵極其嚴密等因具

奏奉

硃批知道了欽此

五十九年五月工部尙書和琳內閣學士和甯會

御苑通志卷八
奏查閱過前後藏漢番官兵及地方甯謐情形夾片
內開查五十七年福康安等

奏定章程每年春秋二季駐藏大臣分往各邊界巡
閱一次順道閱兵等因軍機大臣議准在案彼時
臣和琳係會辦之人緣廓藩初服邊疆甫定須得
大臣前往巡閱藉以彈壓起見現今二載有餘託
賴

皇上洪福天威廓藩極其小心恭順其餘邊外如哲孟雄
各小部落仰息於人斷無他慮又經臣和琳各處
堆立鄂博境界分明可期無事更查衛藏地方較
冷三四月間方始播種八九月內收割凡巡閱之
期正番民農忙之候雖減從輕騎一切照例發與
價值而所用烏拉人夫在所不免況邊境俱極甯
謐衛藏凜奉約束臣等公同商酌似應請

旨嗣後駐藏大臣每年於五六月間農閒之時閱邊看兵
一次既不致營伍廢弛亦不致有妨農業是否有
當伏祈

聖訓等因具
奏奉

硃批是知道了欽此

衛藏通志卷八

衛藏通志卷九

鎮撫

原目作職掌

謹案衛藏事務向由商上自行經理自乾隆五十七年

欽定章程一切大小事件統歸駐藏大臣辦理責任綦重
今彙纂鎮撫一門以昭遵守

乾隆五十七年八月二十七日奉

上諭向來大臣內才堪辦事之人多留京供職其從前派
往駐藏辦事多係中材謹飭之員該大臣等前往居住
不過遷延歲月冀圖班滿回京是以藏中諸事任聽達

賴喇嘛及噶布倫等率意徑行大臣等不但不能照管亦並不預聞是駐藏大臣竟成虛設嗣後藏中諸事皆當隸駐藏大臣管束料理如遇有噶布倫商卓特巴第巴戴琫等缺皆應歸駐藏大臣秉公揀放奏補自當妥立章程俾資經久不得仍前任聽達賴喇嘛噶布倫等專擅以致滋生弊端欽此

又奉

上諭布達拉札什倫布兩處商上向不歸駐藏大臣經管達賴喇嘛班禪額爾德尼平素自奉以及例需用各項俱聽其自便今改隸駐藏大臣總理亦不可過於嚴切應如在京派令經管阿哥等位家務大臣相似不過代其稽查出納不至如從前爲達賴喇嘛班禪額爾德尼弟兄親族暨商卓特巴等藉端侵漁至達賴喇嘛班禪額爾德尼自行支用不可管束太過以示體恤欽此

又奉

上諭前後藏所出租賦向歸達賴喇嘛班禪額爾德尼收用又眾蒙古平素崇信佛教樂施喜捨是以布達拉札什倫布兩處商上蓄積稍裕駐藏大臣向不過問其商卓特巴噶布倫等任意侵蝕如商卓特巴及丹津班珠爾札什敦珠布等皆家計富足皆從何來若非侵漁積

累何由各擁厚貲嗣後商上一切收支應令駐藏大臣
總核凡換班官兵以及駐藏大臣官用已用皆不得於
商上稍有侵那其兩處商上出息養贍喇嘛番眾外或
有贏餘不妨於唐古忒兵丁添補養贍之用福康安等
當向達賴喇嘛等面爲勸諭以大皇帝統屬萬方受其
貢賦除每年賞給官員廉俸兵丁錢糧外遇有水旱偏
災賑恤蠲貸並建築海塘河堤各工程所費不下億萬
萬從無靳惜又普免天下錢糧四次漕米二次亦不下
億萬萬斷無將天下貢賦悉入內帑不養天下百姓之
理爾達賴喇嘛管轄衛藏雖不敢比大皇帝統屬萬方

但卽小可以喻大亦宜思似此存心譬如前輩班禪於
四十五年進京蒙大皇帝賞賜駢蕃在京沿途所得及
各蒙古布施又復不貲總計不下百餘萬若回後藏後
於所得美餘酌爲施濟何致爲賊匪垂涎乃呼畢勒罕
年幼仲巴等又知聚而不知散以致沙瑪爾巴聞而生
心唆使賊匪前至札什倫布搶掠一空多藏厚亡盈虛
消息理有固然卽比佛法而論亦當以施捨爲心錢財
貨物皆係身外之物在俗家尙不容吝情況出家人以
空寂爲務者乎當知波羅蜜中施捨爲第一此後商上
若有美餘達賴喇嘛班禪額爾德尼不可作爲已有並

不得專給喇嘛務須普給番眾俾僧俗聯爲一體以期同心保護衛藏或計算商上支用之外再有美餘不妨亦免衛藏番眾賦納則人心更爲悅服倍資得力欽此
十一月大學士公福康安等會

奏衛藏一切本應駐藏大臣管理乃向來駐藏大臣惟資坐鎮不復預聞積習相沿已久噶布倫等因達賴喇嘛清淨焚修不能留心公事遂假借達賴喇嘛聲勢營私舞弊諸事擅專前此駐藏大臣又復不諳大體一切委之達賴喇嘛轉付噶布倫等任所欲爲以致藏務日就廢弛今當嚴定章程之

時必須革除積弊方可大加整飭查回疆駐劄大臣一切皆歸衡奪其阿奇木伯克等遵照奉行駐藏大臣職分相同嗣後駐藏大臣督辦藏內事務應與達賴喇嘛班禪額爾德尼平等自噶布倫以下番目及管事喇嘛分係屬員事無大小均應稟駐藏大臣辦理以肅紀綱至札什倫布諸務現因班禪額爾德尼年幼係歲琿堪布代管凡遇一切公事亦令一體稟知駐藏大臣辦理並於巡邊之便就近稽查管束庶衛藏事權歸一積弊可以永除矣

又會

奏爲酌定稽查商上收支並勸諭達賴喇嘛酌蠲賦
納普惠番眾事臣等欽奉

諭旨布達拉札什倫布兩處商上收支一切應令駐藏大
臣綜核稽查出入不至如從前侵漁至達賴喇嘛班禪
額爾德尼自用公用各項仍舊聽其自行支用不可管
束太過等因欽此臣等公同查核達賴喇嘛所屬前後
藏地方較爲寬廣每年番民交納係以糧石或以
璫璣大綿鹽飭酥酒奶渣羊腔茶葉等項作爲租
賦其遠處寒落難以運者各以銀錢折交惟番民

有牛羊羣者係每牛二頭每年交銀錢一圓每羊
十隻每年亦交銀錢一圓其隨時布施物件銀兩
並無定數除交各項本色外約計所入銀兩共有
十二萬七千有零凡有交來物件銀兩銀錢俱係
收存大招庫內有商卓特巴三名管理其璫璣藏
香及稅課罰贖之項各處布施之物並番民故後
例交一半服飾物件俱交商上庫內另有商卓特
巴二名管理所有達賴喇嘛公用等項悉皆取給
於此計算用項每年正月內布達拉與各大寺廟
大小眾喇嘛及前後藏各處喇嘛數萬人會集大

招念經二十日謂之默朗穆勒布二月內復集大
招念經八日謂之錯四勒布藏俗謂之攢招按喇
嘛名數賞給銀錢哈達支給酥油茶葉糌粑需銀
七萬九百餘兩又每日念經需用酥油茶葉及各
項賞資每年共需銀三萬九千二百餘兩又每年
採買布達拉眾喇嘛食用及各種物料並酬答布
施物件共需銀二萬四千四百餘兩所入尙不敷
所出又色拉等大寺喇嘛均須養贍若青稞豐收
之年並布達拉布施較多年分始有贏餘商上又
有小庫一處另派商卓特巴一名經管每年出入
如有贏餘物件銀兩歸入小庫存貯如遇不敷之
年卽將小庫內銀物使用一切用度商卓特巴總
司出納亦向噶布倫等呈報前此駐藏大臣從不
過問而達賴喇嘛親族及商卓特巴等侵漁舞弊
在所不免現在商卓特巴等缺議歸駐藏大臣會
同達賴喇嘛秉公揀放不許達賴喇嘛親族管事
所有商上一切公用又奉

旨令駐藏大臣總核實可杜絕弊端敬維

聖意以達賴喇嘛係出世之人不諳俗務疎於查察左右
用事或致串通商卓特巴等乘機舞弊現在商上

本非豐裕之時若再爲人侵蝕達賴喇嘛出入用度更形竭蹶是以仰厯

聖懷特命代爲查核使其管事之人知所顧忌達賴喇嘛受此

恩慈自深欽感臣等查濟隴呼圖克圖居住布達拉耳目更近一切弊竇無難就近確查應交駐藏大臣與濟隴呼圖克圖隨時稽核出納如有侵漁舞弊之人濟隴呼圖克圖卽告知駐藏大臣查辦治罪至札什倫布所管番民較前藏爲少所交商上糧賦多係交納物件統計折色本色約合銀六萬六千

九百餘兩而每年所用約需銀七萬四千六百餘兩從前各處布施較多每年總有贏餘近年以來布施甚少又經廓爾喀搶掠核計每年出入連布施計算僅敷用度班禪額爾德尼年在幼齡恐爲左右朦混亦當駐藏大臣及濟隴呼圖克圖實力稽核以歸畫一所有達賴喇嘛班禪額爾德尼平素自奉以及例應需用各項自應欽遵

諭旨照舊聽其自便不敢過於嚴切以仰副

聖慈體恤再達賴喇嘛商上入項及各處布施若有贏餘自應發心施捨惠及番眾臣福康安奏明濟隴聶

拉木絨轄等處被賊侵擾日久應告知達賴喇嘛酌免各該處租賦一兩年以紓民力據達賴喇嘛回稱查明上年被擾地方除濟隴聶拉木絨轄三處酌免兩年租賦外其餘若宗喀定日噶爾達春堆等處亦擬酌免租賦一年休養民力再闔藏每年俱有欠交租賦擬將五十六年以前積欠全行蠲免仰賴

大皇帝洪福黃教振興商上一有羨餘隨時酌量或予緩征或免衛藏賦納普惠番眾等語臣等詳加體察達賴喇嘛經此一番規勸極知欽仰

聖主恩慈此後竟能常存此心使僧俗聯為一體同心保護衛藏自必改觀等因具

奏奉

硃批欣慰覽之餘有旨欽此

十二月具

奏章程內開一達賴喇嘛班禪額爾德尼與外番通信應告知駐藏大臣詳細商酌也查西藏地方與外番之廓爾喀布魯克巴哲孟雄宗木等處部落皆係接壤向來外番人等來藏或係布施或係講論事務達賴喇嘛等發給書信原無禁例但立言

不得大體易爲外番所輕卽如上次廓爾喀滋事之前曾寄信與達賴喇嘛講論銀錢辦理不能妥協致使藉詞尋衅今廓爾喀業已悔罪投誠將來遇有稟請之事均應由駐藏大臣主持與達賴喇嘛等商同妥協辦理卽將來廓爾喀部長頭目欲專人來藏於達賴喇嘛班禪額爾德尼前呈送土物謝過亦應令駐藏大臣代爲酌定回諭方可發給以昭體例平日如有關係地方事件俱應聽駐藏大臣辦理其餘通問布施書信亦應報明駐藏大臣查驗又布魯克巴曾受

天朝封號該部落素信紅教每年遣人來藏向達賴喇嘛等呈遞布施哲孟雄宗木洛敏湯等小部落半屬外番半屬藏內羈縻各外番部落差人赴藏至達賴喇嘛班禪額爾德尼處布施通問雖不必概爲禁絕仍應立法稽查嗣後各外番部落差人來藏者由邊界營官查明人數稟報駐藏大臣驗放進口並令江孜定日駐劄備弁實力稽查到藏瞻禮後所有各該部落稟駐藏大臣者由駐藏大臣給諭其呈達賴喇嘛等稟帖俱應呈送駐藏大臣譯出查驗由駐藏大臣與達賴喇嘛將諭帖酌定發

給查點人數再行遣回至噶布倫係達賴喇嘛管
事之人不准與各部落私行通信卽各部落有寄
信與噶布倫者亦令呈送駐藏大臣與達賴喇嘛
商同給諭噶布倫等不准私行發信庶內外之防
益昭嚴密

又具

奏一蒙古延請喇嘛誦經應由駐藏大臣給照前往
以資查考也向來青海蒙古王公等差人赴藏延
請通習經典喇嘛赴該游牧地方誦經教經有稟
知駐藏大臣前往者亦有私行前往者漫無稽考

在青海蒙古等久涵

聖澤備

位藩封與內地臣僕無異原不必定以限制但經
過三十九族番地卽與各外番相通若任其私相
往來恐諸弊卽由此而生殊多未便嗣後凡遇蒙
古王公等延請喇嘛誦經者俱令西甯等處大臣
行文來藏再由駐藏大臣給與執照並咨明西甯
辦事大臣以資查考其前往各處外番朝山禮塔
喇嘛及赴蒙古地方募化者亦必須稟明駐藏大
臣領照方准前往設有私往者將該管之喇嘛堪
布等一體查究

又具

奏一駐藏大臣衙門應設譯寫廓爾喀番字通事人役也查駐藏大臣衙門向設譯字房通事各一名祇有譯寫唐古忒字之人從不通曉廓爾喀字跡語言卽唐古忒番民內亦惟近邊一帶尙通廓爾喀語竟無一人能識番字者查巴勒布與廓爾喀語言字跡雖殊尙有兼通之人臣福康安等進兵時

奏明於巴勒布商人中擇其誠實可信者帶往軍營備譯番稟其諳習廓爾喀語言之邊界番民亦酌帶數人作爲通事傳譯語言俱令互相比對以免舛誤今廓爾喀投誠向化按期入

貢自有呈遞駐藏大臣稟帖應請添設廓爾喀譯字人役一名通曉廓爾喀語言通事一名另派唐古忒番民三四名令其學習廓爾喀番語字跡以備將來充補應役查向例通事譯字二名每名日支口糧銀六分四釐三絲九毫仍請照舊例支給又具

奏一駐藏大臣衙門繕寫清字滿洲兵丁向來祇設有四名分派兩衙門未免不敷應於成都駐防滿

洲兵丁內再添派四名來藏應得錢糧分例換班
年分俱照向例辦理仍於前藏漢兵內裁去四名
以符額數等因經軍機大臣議復具

奏奉

旨依議欽此

謹案乾隆十五年以前駐藏大臣接任卸事年
月因珠爾墨特那木札爾不法冊檔無存今將
自十五年起至五十九年止奉

旨駐藏辦事大臣銜名按年編纂

工部侍郎那木札爾 乾隆十五年到藏

副都統班第 乾隆十五年到藏

副都統多爾濟 乾隆十六年五月到任換班第回京

副都統舒春 乾隆十七年七月到任換那木札爾回京

成都副都統薩拉善 乾隆十九年五月到任換多爾濟回京

將軍誠毅伯伍彌泰 乾隆二十一年四月到任換舒春回京

副都統官 保乾隆二十二年十二月到任換薩拉善回京

西甯副都統積福乾隆二十四年閏六月到任換伍彌泰回京

副都統輔 鼎乾隆二十六年四月到任換官保回京

都統傅 景乾隆二十七年閏五月到任換積福回京

副都統阿彌勒圖乾隆二十九年六月到任換輔回京

都統瑪 瑞乾隆三十年九月到任換傅景回京

都統官 保乾隆三十一年十月到任接阿彌勒圖病故遺缺

成都副都統托 雲乾隆三十二年到任換瑪瑞回京

護軍統領莽古賚乾隆三十三年二月到任換官保回京

副都統常 在乾隆三十五年正月到任換托雲回京

副都統索 琳乾隆三十六年六月到任接常在病故遺缺

副都統恆 秀乾隆三十八年五月到任換索琳回京

誠毅伯伍彌泰乾隆三十九年四月到任換莽古賚回京

副都統留保住乾隆四十一年二月到任換伍彌泰回京

副都統恆 瑞乾隆四十二年三月到任換恆秀回京

副都統索 琳乾隆四十四年四月到任換留保住回京

副都統保 泰乾隆四十五年七月到任接索琳病故遺缺

侍郎博清額乾隆四十六年九月到任換恆瑞回京

誠勇公慶 麟乾隆四十八年八月到任換保泰回京

副都統留保住乾隆五十年四月到任接博清額病故遺缺

副都統雅滿泰乾隆五十一年五月到任換留保

成都副都統佛智乾隆五十三年十二月到任

侍郎巴忠乾隆五十四年正月接雅滿泰降級

伊犁參贊大臣舒濂乾隆五十四年二月到任

青海副都統普福乾隆五十四年五月到任換

阿克蘇領隊大臣雅滿泰乾隆五十五年十月到

察哈爾都統保泰乾隆五十五年十一月到任

成都將軍成德乾隆五十六年十月到任接保

四川總督鄂輝乾隆五十六年十一月到任接

副都統舒濂乾隆五十六年十二月到任接鄂

副都統鄂輝乾隆五十六年十一月到任接雅

頭等侍衛額爾登保乾隆五十六年十二月到任

工部尚書和琳乾隆五十七年閏四月到任接

副都統成德乾隆五十七年十二月到任接鄂

內閣學士副都統和甯乾隆五十九年三月到

工部尚書都統松筠乾隆五十九年十二月到

衛藏通志卷九終

衛藏通志卷十

錢法

謹案衛藏地方向係由廓爾喀鑄造番錢運來行使仍兌換銀兩運回自乾隆五十七年欽奉諭旨
 在藏安設鑪座派員監造乾隆寶藏銀錢其廓爾喀番錢永遠停止今照依編纂

乾隆五十七年十一月大學士公福康安等會奏為酌定鼓鑄銀錢章程仰祈

聖訓事竊上年九月內欽奉

諭旨廓爾喀所鑄錢文衛藏竟可毋庸行使莫若西藏地

方安設鑪座派撥官匠鼓鑄用唐古特字模鑄寶藏字樣通行使用等因欽此茲復欽奉

諭旨藏內設鑪改鑄寶藏字樣銅錢所有廓爾喀銀錢嗣後作為銀兩用完銷除等因欽此仰見我

皇上惠敷遠徼便商利民至意伏思衛藏久隸版圖原應通行國寶若有銅礦可開無難就近採辦設鑪鼓鑄惟是藏地素不產銅向來成造佛像俱用巴勒布商人販來銅器銷毀鑄造每觔價銀六錢零若有不敷再赴裏塘西南二十日路程雲南所屬之吉當番地收買熟銅每銅一觔價銀八錢零每年

鑄佛約買熟銅四五千觔即需價銀三四千兩腳價仍不在內藏地山上並無林木偶有些小柴枝炭質脆薄不能燒煉生銅若設鑪鼓鑄寶藏錢文銅觔必須運自滇省而滇銅開採日久近來礦苗漸欠旺盛僅敷京局及各省採辦恐難冀供西藏鼓鑄自滇至藏一路崇山峻嶺不能水運腳價實屬不貲計算採買銅價並柴炭人工腳價等項較之內地加至數十倍更須由內地撥運

帑項添設官員匠役煩費滋多即使通行使用成本已難合算況藏地拉哩西通各部落番民習使銀

錢驟難更易即內地銅錢亦祇行至打箭鑪而止
自打箭鑪直至拉哩全係使用碎銀藏內鑄出銅
錢仍恐不能行使糜費更為不值查從前商上並
不鑄造銀錢專賴廓爾喀運來易換因所鑄新錢
成色較高遂而居奇擡價欲以一圓當作兩圓行
使上年經成德奏明以軍興需用由商上鑄造銀
錢一律通行商民稱便今廓爾喀畏威悔罪經臣
福康安堅明約束不敢再提一圓當兩圓之語已
可永無異議若藏內自鑄銀錢使用使廓爾喀無
所居奇即將來仰蒙

恩准復通貿易商民交易公平更可經久無弊至於銀錢

成色向來每錢一圓重一錢五分總係攙銅成色
過於低潮今若勒令全無攙雜按照輕重兌換銀
兩則工價炭火等項賠貼太多不免大虧成本如
准其酌量攙銅即嚴定限制而日久弊生更屬難
於稽查應請嗣後商上鑄造銀錢純用紋銀成造
不得絲毫攙雜每圓仍重一錢五分紋銀一兩祇
換銀錢六圓是銀錢計重九錢易銀一兩以多出
一錢作為鑄錢工本並另鑄一錢之銀錢一種每
兩易換九圓五分之銀錢一種每兩易換十八圓

均有一錢餘贖成色既無高下之殊鼓鑄亦免貼
賠之累可期永遠通行卽廓爾喀所鑄錢文同係
紋銀彼此均無所藉口所有巴勒布舊錢與商上
原鑄錢文每圓總有銅二三分成色較低今若概
令繳銷勢所不能祇應將商上原錢及巴勒布舊
錢議令每紋銀一兩易換八圓與嗣後鼓鑄足色
銀錢示以區別以昭平允至商上鑄錢工匠物料
俱由商上備辦將易換銀兩所餘之一錢作爲工
本自行經理毋庸動用官項仍交駐藏大臣派員
督同噶布倫等監造驗看成色不許稍有攙雜錢

上正面輪廓上用唐古特字模鑄乾隆通寶字樣
背面用唐古特字模鑄寶藏字樣以昭我

國家同軌同文之盛並於正面中間逐年鑄出造錢
年分用資查考設有攙銅情弊卽行按年查出將
監造之員及該管之噶布倫鑄錢之孜琿濟仲並
匠役等從嚴究問罰賠治罪等因具

奏奉

上諭福康安等奏藏內鼓鑄銀錢章程亦祇可如此辦理
藏內既不產銅所需鼓鑄錢文銅筋仍須向滇省採買
至藏一路崇山峻嶺購運維艱自不若仍鑄銀錢較爲

省便但閱所繪錢模正面乾隆寶藏四字背面鑄寶藏
二字俱用唐古特字模模印並無漢字於同文規制尚
爲未協所鑄銀錢正面用漢字鑄乾隆寶藏四字背面
用唐古特字亦鑄乾隆寶藏四字以昭同文而符體制
已另行模繪錢式發去遵辦欽此

又會

奏前藏鼓鑄銀錢最關緊要應請於前藏內再添糧
務一員於同知知州知縣內派來專管監造銀錢
事務由四川總督揀明白勤慎之人赴藏佐理以
到藏之日起一年一換以便按年稽查銀錢成色

如果勤慎出力由駐藏大臣保奏倘敢徇私舞弊
卽行嚴參辦理又專派鑄錢仔琫二名濟仲喇嘛
二名以專責成又查商上新鑄銀錢不准絲毫攙
雜成色較高通行使用商民稱便惟查番寨租賦
有以銀錢折交物件者若商上收納不公勢必苦
累番民嗣後商上收納銀錢數目及採買各物亦
照所定兌換之數按新鑄舊鑄分別折收不得稍
有浮多以致人心不服等因經軍機大臣議准在
案

五十八年九月工部尙書和琳副都統成德具

奏爲新造乾隆寶藏銀錢酌量變通以利番民仰祈
聖鑒事查從前藏內純用廓爾喀銀錢以致爲成色高低

滋生事端去年辦理善後事宜臣和琳同福康安
等遵奉

聖明指示改鑄乾隆寶藏十足銀錢每銀一兩換一錢五
分重六圓換一錢重九圓換五分重十八圓餘銀
一錢作爲人工火食其攬銅舊錢每銀一兩准換
八圓俱經軍機大臣議覆奉

旨允行在案

臣

等初議原恐廓爾喀商人到藏唐古特到

廓爾喀彼此交易皆係足色紋銀斷不致再有齟
齟起見現在已行一年有餘廓爾喀貿易之人在
藏買賣未嘗不用銀錢臨行皆係易銀而往卽唐
古特貿易之人回藏亦係易銀前來是兩處銀錢
彼此皆不出境亦屬甚便藏中僧俗番民及克什
米爾巴勒布商人並內地漢商兵丁等下餘無知
不論銀之成色高低單論錢之兌換多寡自去年
迄今攬銅舊錢與新鑄之一錢重及五分重者暢
行無滯惟一錢五分重新錢因換六圓之故竟覺
停積臣等再四思維錢法原以通商便民不敢因
係臣和琳議奏在前稍存回護試令監造銀錢局

員暫將一錢五分重銀錢停鑄一面出示每銀一兩仍准兌換一錢重新錢九圓五分重新銀錢十八圓舊錢雖係一錢五分重亦一例准換九圓試行一月有餘現在上下稱便新舊通行相應奏明嗣後毋庸再鑄一錢五分重銀錢庶商上成本有盈無虧源源接濟可以永遠奉行等因具奏奉

硃批知道了欽此

衛藏通志卷十終

衛藏通志卷十一

貿易

謹案衛藏地方爲外番往來貿易人等薈萃之所南通布魯克巴東南通雲南屬之番子東通四川屬之打箭鑪以外各土司北通青海蒙古直達西甯惟西通巴勒布及克什米爾纏頭番民常川在藏居住設慶興販者最多自乾隆五十七年廓蕩底定酌議稽查約束章程統歸駐藏大臣經理謹照依編纂

乾隆五十七年十二月大學士公福康安等會

奏唐古特與外番貿易情形查上次廓爾喀滋擾全
係沙瑪爾巴主持實非因貿易啟衅向來貿易商
民全係巴勒布克什米爾二種並無廓爾喀本地
之人藏內一切食用物件全賴外番一旦嚴禁商
販實於藏番不便倘由官爲經理將貨物等項彙
齊運至交界派員監察又恐派去員弁藉辭索詐
轉啟弊端且藏中貿易俱由巴勒布商夥自行販
貨零賣唐古特又無開行承攬之人無從代爲經
理前經_臣等再四籌畫請將外番商人來藏者酌
定次數由駐藏大臣給照往來江孜定日兩汛官

弁稽查人數其邊界零星交易彼此常有令該營
官就近隨時約束毋許私越自己可便番情而示
限制至邊界番民與接壤居住之巴勒布番民就
近易換鹽米至多不過數包少至升合未便定以
次數限期此等窮番零星市易藉謀口食實與到
藏商民興販貨物者不同不得不分別辦理等因
經軍機大臣議覆具

奏_臣等查唐古特與外番貿易一事前因番民等彼
此爭利易起爭端節經奉

旨令福康安等會同詳議或竟行停止或於一歲中酌定

兩次或四次准其通市仍當官爲經理等因在案嗣經福康安等節次奏到善後事宜摺內所定貿易次數及稽查邊界出入抽收稅課章程各條均經_臣等議以貿易一事尚未議定請俟福康安等接奉

諭旨覆奏到日再行核議亦在案今據福康安等奏稱貿易一事廓爾喀資於藏地之物無多而藏番日用必需邊外物件如米石布疋果品香料銅鐵等物均需向外番購買似有難於禁絕之勢_臣福康安係辦此事之人_臣和琳係駐藏大臣必不肯祇顧

目前稍貽後患等語是唐古特與外番貿易一事勢難禁絕自應照舊通商交市所有福康安等先後奏到貿易事宜各條一併核議據稱查明在藏貿易巴勒布商民四十名商頭三名克什米爾商民一百九十七名商頭三名向俱任其常川興販往來不絕駐藏大臣衙門及達賴喇嘛處並無查考雖經議派第巴一人管理仍屬有名無實嗣後應請查明貿易番回造具名冊交駐藏大臣衙門存案每年巴勒布止准貿易三次克什米爾止准貿易一次於前赴外番營販貨時令商頭呈明駐

藏大臣由何路行走給與印照稽查出入等語均如所奏辦理又據稱請於緊要總路江孜定日二處設立營汛各添設備弁駐劄嗣後貿易出口商民應令該二汛備弁及營官第巴等驗照放行其有自外番來藏商民亦由該二汛官員查明人數稟報駐藏大臣到藏後一體按名註冊立法已爲周密仍應令駐藏大臣隨時查察如該商民等或有爭占便宜不安本分並江孜定日備弁暨駐藏大臣衙門章京筆帖式以及該處營官書吏通事人等有藉端需索及得錢縱容出入等弊卽行嚴參究治以昭懲戒其布魯克巴及哲孟雄宗木等處部落有欲來藏瞻禮者往來出入均應一體查察至所稱邊界番民與接壤居住之巴勒布番民就近易換鹽米不過數包至升合不等未便定以次數限期等語此等窮番居住邊界鄰近外番不過零星市易藉謀口食與出口及到藏興販者不同若一概定以次數限期該番等卽不免生理無資我

皇上加惠番黎一視同仁自應如福康安等所奏毋庸定立次數限期准其照常市易但此等零星貿易卽

在交界處所互相市販未免漫無稽查駐藏大臣遠在前藏又不能紛紛給照嗣後應令駐藏大臣飭知該管營官就近約束嚴行查核毋許私越如此酌定章程既不致經理非人藉端擾累亦不致任聽商民營私牟利於藏內貿易一事實有裨益又據稱濟隴聶拉木抽收稅課毋庸酌減也查邊界地方惟濟隴聶拉木抽收稅課尙屬無多向來收稅則例凡巴勒布商民運米在邊界售賣者每米一包抽取一木碗每年約收稅米一百數十石俱運交大昭以備攢昭念經之用唐古特番民零

星販出鹽筋每包亦抽取一木碗該營官復將所收鹽筋向巴勒布易換製辦藏香之料及紙張果品等物運交商上至巴勒布商民運米來藏各物除米石外其餘並不在邊界納稅祇由該營官記明包數稟知貨物商上到藏後不論粗細每包納銀錢一圓卽金花緞匹珊瑚珍珠細軟之物亦皆係按包收稅惟紅花不以包計算每一克卽納銀錢一圓詳核所收稅課爲數本屬有限日久相安並無爭論今旣蒙

恩准通貿易所有抽收稅課一項並非從前起衅根由若

將往例議減轉似市恩外番裁抑唐古特於體制殊有關係應請將濟隴聶拉木兩處抽收米石鹽筋及貨物到藏按包納稅之處悉照向例辦理等語臣等酌議應如所奏辦理毋庸另議裁減仍令駐藏大臣隨時稽核商上毋得稍有加增以昭平允等因具

奏奉

旨依議欽此

衛藏通志卷十一終

衛藏通志卷十二

條例

原目作章程

謹案自乾隆五十八年

欽定章程及大臣奏議均已分載各門謹遵照原案纂成條例彙爲一門以便檢查

鎮撫

一駐藏大臣督辦藏內事務應與達賴喇嘛班禪額爾德尼平等自噶布倫以下番目及管事喇嘛分係屬員事無大小均應稟命駐藏大臣辦理至札什倫布諸務亦俱一體稟知駐藏大臣辦理仍於

巡邊之便就近稽查管束

一達賴喇嘛班禪額爾德尼之呼畢勒罕以及前後藏大小呼圖克圖之呼畢勒罕察木多類烏齊乍了薩喀西甯等處呼圖克圖之呼畢勒罕一經呈報出世指出數名均由駐藏大臣將其姓名生年月日用清漢唐古忒三樣字繕寫牙籤貯於

欽頒金本巴瓶內先期傳喚喇嘛齊集大昭誦經七日屆期駐藏大臣親往監同抽掣

一前後藏遇有噶布倫戴琿商卓特巴以下大小番目等缺統歸駐藏大臣會同達賴喇嘛揀選分別奏補揀放其達賴喇嘛班禪額爾德尼之親族人等概不准干預公事

一大寺坐牀堪布喇嘛缺出俱由駐藏大臣會同達賴喇嘛秉公揀選給與會印執照派往住持其餘小寺堪布喇嘛聽達賴喇嘛自行揀補

一達賴喇嘛所管大小廟宇喇嘛名數開造清冊及噶布倫所管衛藏地方各呼圖克圖所管寨落人戶一體造具花名清冊於駐藏大臣衙門及達賴喇嘛處各存一分以備稽查

一藏內喇嘛前往各外番朝山禮塔者由駐藏大臣

給與照票限以往還日期回藏之日仍將照票繳銷不得逗遛邊外如有潛行私越者卽行究治
一外番人等來藏布施瞻禮者由邊界營官查明人數稟明駐藏大臣驗放進口事畢後查點人數發給照票再行遣回

一廓爾喀布魯克巴哲孟雄宗木等外番部落如有稟商地方事件俱由駐藏大臣主持其與達賴喇嘛班禪額爾德尼通問布施書信俱報明駐藏大臣譯出查驗並代爲酌定回書方可發給至噶布倫等不得與外番私行發信

一青海蒙古王公等差人赴藏延請通習經典喇嘛赴該游牧地方誦經教經者俱由西甯等處大臣行文來藏再由駐藏大臣給與執照並咨明西甯辦事大臣以資查考

一駐藏大臣每年五六月間

奏明輪流一人前往後藏巡視邊界操閱番兵所用烏拉人夫俱自行給與價值不得擾累番民以示體卹

一駐藏大臣衙門向例設有唐古忒通事譯字二名今增設廓爾喀通事譯字二名共四名每名每日

給支口糧銀六分四釐三絲九毫另派唐古忒番民三四名令其學習廓爾喀番語字跡以備將來充補

一廓爾喀在藏學習漢字學生四名每人每月支給口糧銀五兩由商上發給

職掌

一理藩院司員一員管理達木蒙古八旗官兵三十九旗番民事務承辦駐藏大臣衙門清文稿案三年更換

一達木蒙古官兵共五百二十八戶在藏當差官兵

八十三員名每月商上發給錢糧其餘俱在達木地方游牧聽候調遣

一達木八旗固山達八員佐領八員驍騎校八員

一三十九族總百戶一員百戶十三員百長五十三員

一三十九族共四千八百八十九戶每戶每年徵收貢馬銀八分共徵收銀三百九十一兩一錢二分交納商上

一理藩院筆帖式一員專司駐藏大臣衙門文移繙清譯漢三年更換

一前藏糧務一員管理倉庫糧餉承辦駐藏大臣委
審案件三年更換

一應支駐藏大臣兩衙門每月豐折加增及通譯口
糧共銀四百四十三兩零又應支司員筆帖式二
員每月豐折通事口糧共銀八十五兩九錢零又
應支前藏糧務一員每月折色月費及通譯口糧
共銀一百三十六兩八錢零又應支副糧務一員
每月折色月費及通譯口糧共銀七十一兩三錢
又應支遊擊一員每月折色鹽菜及通事口糧共
銀四十二兩一錢零又應支守備一員每月折色

鹽菜共銀三十兩四錢零又應支千總二員每月
折色鹽菜共銀三十六兩八錢又應支把總二員
每月折色鹽菜共銀三十四兩四錢又應支外委
五員每月折色鹽菜共銀四十四兩五錢又應支
兵丁四百五十五名每月餉銀共二千二百二十
九兩五錢又應支倉夫六名每月口糧共銀十七
兩六錢以上俱小建扣除
一應支

關帝廟春秋祭祀銀十六兩又達賴喇嘛每年承領
恩賞銀一千兩俱年終造報

一前藏倉額貯青稞二千七百石小麥三百石共三千石

一後藏江孜定日分駐官兵二百零八員名每年共應發月費口糧等項銀一萬二千兩

一副糧務一員專司監造銀錢一年更換

一後藏糧務一員專司監放番兵口糧及駐藏大臣委查事務三年更換

一拉里糧務一員管理支放兵餉承辦該處委審案件三年更換

一拉里各塘汛弁兵三年共需月費口糧銀三萬六千兩零

一拉里倉額貯稞麥一千二百石

一察木多糧務一員管理支放兵餉承辦該處委審案件三年更換

一察木多暨所屬各塘汛官兵三年共需月費口糧銀三萬四千七百兩零

一察木多倉額貯稞麥一千二百石
番目

一噶布倫四名每名每年支俸銀一百兩大緞四疋戴琫六名每年支俸銀五十兩大緞二疋由駐藏

大臣衙門造具名冊咨送理藩院移咨戶部支領
如有陞革事故一併咨報理藩院查核

一噶布倫戴琫等例得達賴喇嘛撥給寨落莊田一
經缺出卽查明交代與新任接手之人收管以資
辦公毋得據爲己有

一噶布倫係三品頂帶 戴琫 仔琫 商卓特巴
係四品頂帶 邊缺營官 大缺營官 如琫

業爾倉巴 協爾帮 朗仔轄 希約第巴係五
品頂帶 中缺營官 甲琫 達琫 噶厦大中
譯 卓尼爾係六品頂帶 小缺營官 定琫

噶厦小中譯 管門 管草料 管糶粃 管帳

房 管柴薪 管牛羊廠之各第巴係七品頂帶

一應賞頂帶缺內有喇嘛缺出以喇嘛補放俗人缺
出以俗人補放每屆年終將陞革喇嘛俗人各名
數造冊咨報理藩院備查

一噶布倫缺出在管番兵之戴琫商上管賬目之仔
琫管事之商卓特巴內揀選擬定正陪請

旨補放

一戴琫缺出在新設管番兵之如琫內揀選如不得
人再於邊缺營官內揀選擬定正陪請

旨補放不得以並未管兵之人充補

一四品仔琿商卓特巴缺出在五品管口糧之業爾倉巴五品管刑名之協爾挈六品噶廈辦事之大中譯陞補或濟仲喇嘛內揀選陞補

一五品業爾倉巴協爾挈缺出在外管事五品之希約第巴管地方五品之朗仔轄密本調補管馬廠之六品達木陞補如係喇嘛缺出仍以喇嘛坐補一五品希約第巴密本達木缺出在五品之大缺營官五品之邊缺營官內調補及六品之噶廈卓尼爾內揀選陞補

一五品邊缺營官缺出以五品之大缺營官調補或以六品之中缺營官六品之甲琿六品之噶廈大中譯陞補

一五品大缺營官缺出以七品小缺營官七品小中譯陞補

一六品大中譯缺出以六品之噶廈卓尼爾調補或以七品小中譯陞補

一七品小缺營官缺出准於東科爾及喇嘛內選用一六品卓尼爾七品小中譯缺出選東科爾內心地明白者挑補

一挑取六品卓尼爾七品小中譯七品小缺營官須年至十八歲以上方准當差不得以幼小之人應名充數

一布達拉管門管糶粃管草料管帳房管牛羊廠之各第巴聽達賴喇嘛自行揀補

一布達拉喇嘛等除業爾倉巴希約第巴向有喇嘛充補數缺仍照舊例按次補用外其餘祇准在布達拉及大小寺廟充當大小執事將喇嘛揀選噶布倫之例永行停止

一 邊缺營官與外番接壤約束番民稽查出入最關

緊要如果到任三年辦理妥善駕馭得宜卽行更換記名以戴琫等缺陞用倘辦理不善立即革退喇嘛補放營官仍在達賴喇嘛前服役者由駐藏大臣另派委員前往該管地方代理該喇嘛營官不得私行派人前往

一札什倫布商卓特巴缺出以歲本森本喇嘛陞用歲琫缺出以濟仲喇嘛陞用森本缺出以傳事之卓尼爾陞用俱會同駐藏大臣給與印照其該處營官各缺仍照定例揀選充補

一札什倫布管茶葉管柴草等喇嘛聽班禪自行揀

補

一察多木乍了類烏齊三處呼圖克圖管事之商卓
特巴缺出由該呼圖克圖揀選二三名稟明駐藏
大臣會同達賴喇嘛補放

一補放各缺均由駐藏大臣會同達賴喇嘛選定後
會發清漢唐古忒三樣字印照給與該番目收執
營官缺分

一 邊缺營官十四缺共二十三名黑人二十二名喇嘛一名江卡

與巴塘土司交界堆噶爾本與納達交界哈拉烏蘇與二十九

錯拉與布魯克巴交界帕克哩與布魯克巴交界定結與哲孟雄交界聶

拉木與廓爾喀交界濟龍與廓爾喀交界官覺與三暗巴交界補仁與所

屬奔阿爾交界博窩與波密交界工布碩卡與波密交界絨轄爾與廓

爾喀交界

一大缺營官十缺共十九名黑人十五名喇嘛四名乃東 瓊

結 貢噶爾 崙孜 桑昂曲宗 工布則崗

江孜 昔孜 脅噶爾 納倉

一中缺營官四十二缺共五十九名黑人四十名喇嘛十九名洛

隆宗 角木宗 打孜 桑薩 巴浪 仁本

仁孜 朗嶺 宗喀 撒噶 作崗 達爾宗

江達 古浪 沃卡 冷竹宗 曲水 奪宗

雜仁 茹拖 鎖莊 子奪 結登 直谷 碩
 板多 拉里 朗 沃隆 墨竹工 卡爾孜
 文札卡 轄魯 策堆得 達爾瑪 聶母 拉
 噶孜 碩 納布 嶺喀爾 朗錯 羊八井
 麻爾江
 一小缺營官二十四缺共二十四名
黑人十四名 喇嘛十名 金
 東 拉載 撒拉 浪蕩 頗章 扎溪 色
 堆沖 汪墊 甲錯 拉康 瓊科爾結 蔡里
 曲隆 札稱 折布嶺 札什 洛美 嘉爾
 布 朗茹 哩烏 降 業黨 工布塘

綠營

一駐劄前藏遊擊一員守備一員千總二員把總二
 員外委五員漢兵四百五十五名後藏都司一員
 把總一員外委一員漢兵一百四十名
 一駐劄江孜守備一員外委一員漢兵二十名定日
 守備一員把總一員外委一員漢兵四十名
 一駐劄察木多遊擊一員千總一員把總一員外委
 一員江卡汛守備一員把總一員梨樹汛外委一
 員石板溝汛把總一員外委一員昂地汛把總一
 員碩板多汛千總一員外委一員拉里汛把總一

員外委一員江達汛外委一員共兵六百十八名
一駐藏大臣衙門應差兵丁每處三十名遊擊八名
都司六名守備二員每員四名駐藏司員四名筆
帖式二名千總把總每員一名前藏糧員看庫兵
丁八名每遇操演日期操演毋許藉口應差致有
曠廢

番營

一戴琫六名由達賴喇嘛處每名各撥給莊田一分
俾資辦公如琫每名每年酌給銀三十兩甲琫每
名每年酌給銀二十兩定琫每名每年酌給銀十

四兩八錢俱由商上支給此項銀兩令商上於春
秋兩季備文送交駐藏大臣衙門轉發該管將備
會同戴琫傳齊番目支領如有侵漁剋扣情弊一
經查出卽行嚴參治罪

一額設番兵三千名每年給與青稞二石五斗
分爲兩季由該管將備會同戴琫等按名散給如
有侵漁剋扣一經查出卽行嚴參治罪遇有征調
再照征兵之例每名每日由商上支給糈粃一觔
一如琫十二名每名管兵二百五十名甲琫二十四
名每名管兵一百二十五名定琫一百二十名每

名管兵十五名以上大小番目俱由駐藏大臣會同達賴喇嘛揀選年力精壯之人充補發給委牌倘有廢弛軍律者卽行革退

一番兵三千名內駐劄前藏一千名駐劄後藏一千名駐劄定日五百名駐劄江孜五百名

一番兵三千名每一千名定以五分烏鎗三分弓箭二分刀矛按期操演

一番兵服色烏鎗兵穿紅褐背心弓箭兵穿白褐背心刀矛兵穿紅邊白褐背心各書番兵二字

一番民挑定額兵者俱由達賴喇嘛發給執照免其一家充當烏拉徭役以示體卹如有事改革退仍將執照繳回

一番兵三千名俱係定額實數該管將備及戴琿等不得擅行役占若例外私令跟隨服役以致操防乏人一經查出卽行從嚴治罪

一東科爾中如有情願充當番兵及定琿兵目者准其充伍按次陞用不許躐等超拔番兵中如有材技出眾者不但拔補定琿仍一體按次陞擢至戴琿不得以非東科爾世家阻其上進之路

一唐古忒兵丁責令該管將備督同番目常川操演

律苑通志卷十一
駐藏大臣親爲較閱技藝純熟者酌加獎賞併將該管之番日記名陞擢技藝生疎者嚴加責懲屢教不悛卽行斥革該管之番目亦分別責降示懲一駐防將備俱以所管番兵優劣爲等由駐藏大臣於伊等年滿時查優等者咨送本省總督將軍提督准予保題仍照舊例陞用次等者咨部議敘劣等者卽行參革

一前後藏定日江孜駐防官員由四川總督遵

旨揀選頭等出色員弁派來分駐駐藏大臣秉公驗看如

係以平庸之員充數卽駁回不得稍有徇隱一駐防將備弁兵如有營私舞弊欺凌唐古忒兵丁等事許戴琫等稟知駐藏大臣隨時嚴辦如該戴琫番目等操防怠惰苦累番民亦許將備等稟明究辦

一現存火藥俟將次用竣約數兩年備用之時照例在藏酌造核計每年應需火藥數目由駐藏大臣衙門發給印票交噶布倫差派誠實番目前赴工布地方製造運解來藏倘有私造透漏及擾累該處番民等弊一經查出從嚴究辦

一鉛丸火繩仍照向例由川省運解到藏以備操演馬政

一前藏聽差營馬六十四匹後藏聽差營馬二十四匹

一自南墩迤西百里之江卡起至江達底塘止四十

三塘共塘馬二百二十四匹

一前藏迤西底塘起至後藏定日止新設番塘二十四處共番馬九十八匹

貿易

一在藏居住貿易之巴勒布克什米爾等准其常川興販查明該番回商頭等名數若干造具清冊交

駐藏大臣衙門存案備查

一巴勒布每年准貿易三次克什米爾每年准貿易

一次於前赴外番營販貨物時該商頭呈明駐藏大臣由何路行走發給執照以便稽查出入

一凡在藏貿易之外番商民請領駐藏大臣照票出口過江攷定日由該備弁查驗明確始准放行其自外番來藏者亦由該備弁查明人數報明駐藏大臣一體按名註冊以備查考

一唐古忒邊界番民與接壤居住之巴勒布番民就近易換鹽米飭令各該管地方備弁營官就近約

東稽查毋許私越

- 一 濟隴聶拉木兩處抽收米石鹽筋及貨物到藏後按包納稅俱照舊例辦理毋得稍有加增
- 一 在藏商民等或有爭占便宜不安本分等事聽駐藏大臣隨時查辦如駐藏大臣衙門及各文武員弁衙門書吏通事人等有藉端需索等弊一經查出卽行從嚴參究懲治
- 一 江孜定日駐防備弁如有藉端需索外番及擾累商民並或得錢縱容出入等弊一經查出卽從嚴參革治罪

錢法

- 一 鑄造銀錢正面用漢字鑄乾隆寶藏四字背面用唐古忒字鑄乾隆寶藏四字
- 一 銀錢以重一錢重五分兩項搭配鑄造每紋銀一兩准兌換一錢重新錢九圓五分重新錢十八圓其舊錢係一錢五分重者亦一例兌換九圓作爲定價
- 一 鑄錢銀兩由商上支發該局鑄出錢文易換銀兩卽將所換之銀改鑄銀錢每錢九圓易銀一兩所餘一錢作爲炭火傾銷之費

一番寨租賦有以銀錢折交物件者商上收納時卽照所定兌換之數按新鑄舊鑄分別折收不得稍有浮多至採買各物亦須公平交易不得苦累商民

一鑄錢局內專派仔瑋二名濟仲喇嘛二名以專責成

一監鑄局員如果勤慎出力由駐藏大臣保奏倘敢徇私舞弊卽行嚴參辦理

租賦

一前後藏所出租賦悉歸達賴喇嘛班禪額爾德尼收用至商上一切出納應統歸駐藏大臣稽查總核以杜商卓特巴等侵漁之弊凡駐藏大臣衙門官用以及換班官兵皆不得於商上稍有侵那一各寨租賦應按年徵收清交商上該商卓特巴立限嚴催經徵之濟仲營官第巴等年清年款不得違限拖延亦不許先一年預徵租賦如各寨有逃亡絕戶實在田畝拋荒者卽將該戶租賦豁免俟有佃種之人再行照例陞科

差徭

一藏內凡大族人戶及大寺喇嘛各處免差照票一

律通志卷二十一
概停止務使闔藏徭役均平不致窮番苦累如實
有勞績者達賴喇嘛告知駐藏大臣方准給票至
新設番兵於挑補兵缺時仍准發給照票免差出
缺繳銷

一喇嘛番目人等私事往來不得擅用烏拉亦不得
私發信票如遇因公差遣有必須烏拉之處須稟
明駐藏大臣及達賴喇嘛發給用印照票編定號
數始准應付

邊防

一濟隴聶拉木絨轄喀爾達薩喀崑布定結怕克哩
沿邊一帶均已設立鄂博駐藏大臣於巡查邊界
之便隨時派人堆砌石塊不得日久廢弛致有偷
越

一江孜地方與定結怕克哩喀爾達相通爲布魯克
巴哲孟雄等處部落來藏要路且由江孜至薩迦
溝行走又可繞往聶拉木一帶邊界其唐古忒營
官卽令該處駐防備弁管束

一定日地方爲聶拉木濟隴絨轄要路又可通薩喀
等處其唐古忒營官卽令該處駐防備弁管束
一定日地方遼闊通絨轄之小路轄爾多通宗喀之

德勝通志卷十二
小路擦木達杏嶺通聶拉木之小路古喇噶木炯
並宗喀共計五處每處設定瑋一名番兵二十五
名卽於定日現設番兵五百名內就近派撥安設
一律隨時操演

一喀爾達地方卡隘二處一名撒甲嶺一名春堆均
與廓爾喀相通又定結地方卡隘一處名擢拉山
與廓爾喀哲孟雄兩路相通又帕克哩地方卡隘
三處一名哲孟山與布魯克巴相通一名哈爾山
與布魯克巴小路相通一名宗木山與宗木相通
以上卡隘六處均歸江孜守備派撥番兵分防巡

守

衛藏通志卷十二終

衛藏通志卷十二

其

